

Ena cuntraversa cun piztgeidas

Claudia Cadruvi/FMR

Marcel Züger fora ainten en vesperer cuagl sies studi davart la biodiversitad. Ampusto igl studi è l'Uniun purila svizra. Lezza dovra las passa tschent paginas scu argumentari cunter l'Iniziativa da biodiversitad. Biologas e scienzios scassan pero la testa – u sa vilaintan.

«Ins duess visar la piazza a mintga protectour dalla nateira tgi passainta duple tg'en de l'emda ainten biro.» – Chella construcziun na cumpara betg forsa aint igl Blick. Na, ins la pô liger ainten en l'intervista dalla NZZ cun Marcel Züger. Tenor igls criteris digl biolog da Salouf concernent «li da lavour», pardessan damai rotschas da biologas, ornitologs, protectouras dalla nateira e scienzios lour piazza.

«Nigna crisa da biodiversitad»

La NZZ n'ò pero betg fatg l'intervista cun Marcel Züger perveia dallas sias remartgas piztgaintas, mabagn percheigl tg'è ò scretg en studi da passa 100 paginas per l'Uniun purila svizra. Igl studi vign tranter oter alla conclusiun: «I na dat ainten Svizra sen camp naziunal nigina 'crisa da biodiversitad' generala u bagn ena 'mureia dad insects u da speztgas'». Chegl è sa tgapescha muniziun per igl cumbat dall'Uniun purila cunter l'Iniziativa da biodiversitad tgi vo an votaziun igls 22 da settember 2024. Igl studi lavainta alteraziuns aint igls tschertgels dalla protecziun dalla nateira. Las medias peglian se la tematica. Ellas laschan neir a pled er igls critichers. Igl ezs sottastretg ed insistan tgi tot igls indicatours mossan en regress tar la biodiversitad ainten Svizra. Glez demossan blers studis.

Igl consens scientific è en oter

Uffizialmaintg peglia igl Institut federal per la perscrutaziun da gôt, neiv e cuntrada (WSL) posiziun. «Ainten la scienza dattigl en consens accepto largiamaintg tg'igl stadi ed igl svilup dalla biodiversitad è an general critic e tgi dovra stentas sen tot igls levels», stat scretg ainten ena comunicaziun uffiziala digl institut. Crititgia fermamaintg vign er tgi Marcel Züger ò examino angal igl taimp a parteir digl 1990 – vot deir circa igls davos 30 onns – e constatescha tgi ainten chel interval seian sa migliuros tscherts indicatours dalla biodiversitad. Ma igls contrahents da Marcel Züger fon valeir tgi gist durant igls onns novanta era la biodiversitad ainten en stadi ferm desolat. La biodiversitad era da lez taimp pigiu-



Marcel Züger è biolog, ò pero er luvro ples onns scu legnamer, bostger u gidanter sen bagn purils.

Foto Claudia Cadruvi

rada a moda schi massiva tgi na seia betg anc ena bunga nova, sch'igl svilup seia sa migliuro en po siva da chels onns.

Igl biolog da Salouf sa defenda

Gist tar chel punct dalla critica dei Marcel Züger: «Avant igl 1990 vainsa pacas datas sistematicas. Ia va lia risguardar igl svilup ainten l'antiera Svizra e betg forsa far studis angal regionalis.» Per chel interval n'ins possa betg discorrer d'ena crisa da biodiversitad. Ainten blers camps ins vegia via ena stabilisaziun u perfign ena migliuraziun igls davos onns. «Glez mossa er tgi las maseiras per pro-

«Ainten la scienza dattigl en consens accepto tg'igl stadi dalla biodiversitad è an general critic e tgi dovra stentas sen tot igls levels.»

Institut federal per la perscrutaziun da gôt, neiv e cuntrada (WSL)



Tschertas speztgas da libellas ins vei oz pi savens perveia dalla renaturalisaziun dad avas.

Foto MAD

mover la biodiversitad funcziunan e tg'ins è sen la dretga veia», dei Marcel Züger alla FMR. Tgi l'Uniun purila svizra dovra igl studi scu argumentari cunter l'Iniziativa da biodiversitad na disturba betg igl biolog. Anzi, el disturba pitost tg'ins amprova sistematicamaintg da minimisar igls progress digls davos onns. «Ia vign a votar NA all'iniziativa», dei Marcel Züger. La formulaziun dall'iniziativa seia bagn simpatica, ma el vei tge tgi vigna fatg effectivamaintg puncto biodiversitad. «Nous ischan sen la veia tar ena birocratisaziun e teoretisaziun», explitgescha el. Ainten biros ins amprova da cattar schliaziuns per duple biodiversitad e cumonda alloura da surangiug tge tgi vegia da capitar or aint igl liber.

Mengia gronda birocrazeia

L'iniziativa federala actuala promova chel trend. La birocrazeia crescha, anstagl dad investier igls costs ainten la lavour practica ainten la nateira. Marcel Züger fò en exampl: durant ena vista oculara per en pitschen project da seivs veivas ed uals sitgs seian neidas passa diesch persungas digl fatg per giuditgier la tgossa. Las maseiras concretas per las seivs veivas vegian custo radond 25 000 francs, igls costs administrativs e da planisaziun vegian munto a 12 000 francs. I detta anc bler potenzial da migliurar l'effectividad e l'effizienz dalla maseiras da protecziun dalla nateira. Arisguard igl sies critichers intunescha Marcel Züger tgi betg tots cunterdeian ad el. Tscherts scienzios conferman per part la sia analisa, ma teiran alla fegn otras conclusiuns.

L'Uniun purila svizra ò publitgia igl studi «Biodiversität im Schweizer Kulturland – positive Entwicklungen und Problemfelder» sen la sia pagina d'internet.